

**Մի շարք դեպքերում
Հանձնաժողովի
եզրակացությունները չեն
համապատասխանել
«Լիցենզավորման մասին» ՀՀ
օրենքի, Լիցենզավորման
կարգի, ինչպես նաև
լիցենզավորման
հանձնաժողովի
կանոնադրության
պահանջներին**

Հաշվի առնելով, որ ըստ ՀՀ օրենսդրության՝ իրավական ակտերը մեկնաբանվում են դրանում պարունակվող բառերի և արտահայտությունների տառացի նշանակությամբ, ապա այն դեպքերում, երբ ներկայացված հայտերը չեն համապատասխանել ՀՀ օրենսդրության պահանջներին, սակայն լիցենզավորման հանձնաժողովը տվել է դրական եզրակացություն և անձինք լիցենզավորվել են, պետք է փաստել, որ Հանձնաժողովի եզրակացությունները չեն համապատասխանել «Լիցենզավորման մասին» ՀՀ օրենքի 29-րդ հոդվածի, ՀՀ կառավարության 29.06.02թ. թիվ 867-Ն որոշմամբ հաստատված Լիցենզավորման կարգի՝

20-րդ կետի, ինչպես նաև լիցենզավորման հանձնաժողովի կանոնադրության 2-րդ, 18-րդ և 19-րդ կետերի պահանջներին:

Այն դեպքերում, երբ ներկայացված հայտերը չեն համապատասխանել ՀՀ օրենսդրության պահանջներին /Օրինակ՝ լիցենզավորվող գործունեության համար սահմանված պարտադիր սարքավորումների բացակայություն, թերություններ և այլն/, սակայն լիցենզավորող հանձնաժողովի կողմից անձինք լիցենզավորվել են, ապա փակ գաղտնի քվեարկության ընթացքում հանձնաժողովի կողմ քվեարկած անդամները որոշումներ կայացնելիս առաջնորդվել են այլ մոտեցումներով՝ հաշվի չառնելով ՀՀ օրենսդրությամբ սահմանված պահանջները:

Նման մոտեցմամբ իրականացված լիցենզավորման գործընթացի պարագայում կարելի է պնդել, որ վերանում է ՀՀ օրենսդրությամբ սահմանված պահանջների, ինչպես նաև լիցենզավորման գործակալության կողմից այդ պահանջների առկայության վերաբերյալ իրականացված ուսումնասիրությունների անհրաժեշտությունը, քանի որ լիցենզավորող հանձնաժողովը իր որոշումները /եզրակացությունները/ կայացնելիս չի հիմնվում այդ ուսումնասիրությունների արդյունքների վրա:

Եզրակացությունները, ըստ օրենսդրության պահանջի, լիցենզավորման հանձնաժողովը ներկայացնում է ՀՀ առողջապահության նախարարին: Նախարարն իր որոշումներն ընդունում է համապատասխան եզրակացությունների հիման վրա, սակայն լիցենզավորող մարմինը, համաձայն «Լիցենզավորման մասին» ՀՀ օրենքի 9-րդ հոդվածի 1-ին կետի, իրավունք ունի որոշման համար հիմք չընդունել հանձնաժողովի եզրակացությունները՝ հիմնավորելով եզրակացությունները չընդունելու պատճառները:

Հավելված 2-ում բերված են 01.01.17թ-01.11.18թ. ընթացքում բժշկական օգնության և սպասարկման իրականացող լիցենզավորված թվով 67 անձանց ցանկը, որոնց ներկայացրած հայտերը չեն համապատասխանել ՀՀ օրենսդրության պահանջներին և գործակալության կողմից տրվել է բացասական եզրակացություն, սակայն Հանձնաժողովը փակ գաղտնի քվեարկությամբ տվել է դրական եզրակացություն և անձինք լիցենզավորվել են:

Ե. ՀՀ առողջապահության նախարարի 03.09.2014թ. թիվ 58-Ն հրամանի համապատասխան իրականացված ընտրանքային ուսումնասիրությունների վերաբերյալ

ՀՀ կառավարության 29.06.2002թ. թիվ 867-Ն որոշմամբ հաստատված բժշկական օգնության և սպասարկման Լիցենզավորման Կարգի 12-րդ կետով սահմանվել է, որ.

–«Բժշկական օգնության և սպասարկման լիցենզիա ստանալու համար ներկայացված փաստաթղթերում առկա տեղեկությունների համապատասխանության ստուգման ճշգրտությունը մարմնի կողմից իրականացվում է ընտրանքային ուսումնասիրության միջոցով, որի արդյունքների հիման վրա կազմվում է արձանագրություն: Ընտրանքային ուսումնասիրության անցկացման կարգը սահմանում է լիազոր պետական մարմինը» /12-րդ կետը խմբագրվել է ՀՀ կառավարության 01.08.13թ. թիվ 956-Ն որոշմամբ և ուժի մեջ է մտել 24.12.2013թ.-ից/:

Համաձայն լիցենզավորման կարգի նշված կետի, ՀՀ առողջապահության նախարարի կողմից 03.09.2014թ.-ին ընդունվել է «Ընտրանքային ուսումնասիրության կարգը սահմանելու մասին» թիվ 58-Ն հրամանը /ուժի մեջ է 11.10.14թ.-ից/, ըստ այդ կարգի՝

–ընտրանքային ուսումնասիրությունն իրականացվում է համակարգչային պատահական ընտրության միջոցով /2-րդ կետ/,

–ընտրանքային տեղում ուսումնասիրությունը իրականացվում է ՀՀ առողջապահության նախարարի համապատասխան հրամանի հիման վրա, նշելով՝ ուսումնասիրության նպատակը, իրականացման վայրը, ժամկետը և այլն,

–ընտրանքային /տեղում/ ուսումնասիրություն իրականացնող հանձնաժողովը կամ աշխատակիցը ուսումնասիրում է լիցենզիա ստանալու համար ներկայացված հայտում և կից փաստաթղթերում նշված տեղեկությունների իսկությունը՝ օրենսդրությամբ սահմանված լիցենզավորման պարտադիր պայմանների և պահանջների առկայությունը և ուսումնասիրության արդյունքների հիման վրա կազմում է արձանագրություն /կարգի 8-րդ կետ/:

20% լիցենզավորվող անձանց մոտ տեղում ուսումնասիրություններ չեն իրականացվում

Ուսումնասիրելով 01.01.2017-01.11.2018թթ. ընթացքում ՀՀ ԱՆ կողմից իրականացված լիցենզավորման գործընթացները, պետք է նշել, որ լիազոր մարմինը համակարգչային պատահական ընտրությունները իրականացնում է համապատասխան համակարգչային ծրագրի միջոցով իրականացված խաղարկու-

թյունների հիման վրա և յուրաքանչյուր խաղարկության արդյունքում հայտ ներկայացրած անձանց ընդհանուր թվի 80%-ի մոտ տեղում՝ իրականացվում են լիցենզավորման պարտադիր պայմանների և պահանջների առկայության վերաբերյալ ուսումնասիրություններ, իսկ 20% լիցենզավորվող անձանց մոտ տեղում ուսումնասիրություններ չեն իրականացվում, վերջիններիս մոտ իրականացվում են միայն փաստաթղթային ուսումնասիրություններ /նշվածը բերված է նաև ՀՀ առողջապահության նախարարի 15.11.18թ. թիվ ԱԹ/14.2/16663-18 գրությամբ/:

Տեղում ուսումնասիրվող 80% չափի և չուսումնասիրվող 20% չափի հարաբերակցությունների սահմանման վերաբերյալ լիազոր մարմնի կողմից որևէ իրավական ակտ չի ընդունվել:

**Կազմակերպված
խաղարկություններին
մասնակցած 512
հայտատուներից 95-ի մոտ չեն
իրականացվել տեղում
ուսումնասիրություններ**

Նշված ժամանակաշրջանում համաձայն լիցենզավորող մարմնի կողմից ընդունված Կարգի, միայն բժշկական օգնության և սպասարկման իրականացման լիցենզավորման նպատակով՝ կազմակերպված խաղարկություններին մասնակցած 512 հայտատուներից 95-ի մոտ չի իրականացվել տեղում ուսումնասիրություններ՝ ՀՀ օրենսդրությամբ

սահմանված լիցենզավորման պարտադիր պայմանների և պահանջների առկայության վերաբերյալ: Վերջիններիս մոտ իրականացվել են միայն փաստաթղթային ուսումնասիրություններ և 75 անձի տրամադրվել է լիցենզիա, 16-ը մերժվել է, իսկ 4-ի գործընթացը դադարեցվել է սեփական դիմումի համաձայն:

Հավելված 3-ում բերված են 01.01.17թ-01.11.2018թ. ընթացքում բժշկական օգնության և սպասարկման իրականացման լիցենզավորման նպատակով դիմած 95 հայտատուների ցանկը, որոնց մոտ համաձայն 58-Ն հրամանի չի իրականացվել տեղում ուսումնասիրություններ օրենսդրությամբ սահմանված լիցենզավորման պարտադիր պայմանների և պահանջների առկայության վերաբերյալ:

Հիմք ընդունելով «Լիցենզավորման մասին» ՀՀ օրենքի 12-րդ, 13-րդ և 15-րդ հոդվածները ՀՀ կառավարությունը 05.12.2002թ. թիվ 1936-Ն և 29.10.2009թ. թիվ 1275-Ն որոշումներով սահմանել է *բժշկական օգնության և սպասարկման տեսակների գործունեության համար անհրաժեշտ տեխնիկական հագեցվածության և մասնագիտական որակավորման պայմաններն ու պահանջները*:

Միաժամանակ անհրաժեշտ է նշել, որ Լիցենզավորման Կարգի «Լիցենզավորման պարտադիր պահանջները և պայմանները» բաժնի 14-րդ կետը սահմանում է, որ.

-լիցենզավորվող անձինք պետք է ապահովեն բժշկական հաստատություններին ներկայացվող մասնագիտական, ինչպես նաև բժշկական սարքավորումներով ապահովվածությանը ներկայացվող պարտադիր պայմանները և պահանջները, որը ըստ նույն լիցենզավորման Կարգի 20-րդ կետի 5-րդ ենթակետի պահանջի՝ լիցենզիա տրամադրելու հայտերի մերժման հիմք է:

Առանց բժշկական հաստատություններին ներկայացվող պարտադիր պայմանների և պահանջների ապահովման ներկայացված հայտերը պետք է մերժվեն համաձայն ՀՀ կառավարության 29.06.2002թ. թիվ 867-Ն որոշմամբ հաստատված Լիցենզավորման Կարգի 14-րդ և 20-րդ կետի 5-րդ ենթակետի պահանջների: